

正紅旗漢軍名臣傳

正紅旗漢軍名臣傳 一卷

三十八



八旗通志初集卷之一百七十八

名臣列傳三十八

正紅旗漢軍世職大臣一

孔有德



孔有德漢軍正紅旗人世居遼東。天命六年三月。

太祖高皇帝征明。取遼東。有德與同里人耿仲明奔入皮島。並為明島帥。毛文龍部下。未幾文龍以罪為寧遠經畧袁崇煥所殺。明山東登州巡撫。招有德與仲明往歸。俱授叅將。天聰五年。

太宗文皇帝親統大兵征明。圍大凌河。登州巡撫遣有德率騎兵八百赴援。至吳橋縣。遇巡撫所遣買馬叅將李九成。二人以明政不綱。共謀為亂。遂

合將弁陳繼功李尚友曹得功等五十餘人率兵數千以叛。陷臨邑陵商河青城等縣。殺敗官兵千數。獲馬匹器械甚多。還攻登州。城中耿仲明率遼東官十五人為內應。遂破其城。收遼東三千餘人。以巡撫素行仁義。不忍殺。縱之去。於是明旅順口駐防叅將陳有時。廣鹿島副將毛承祿亦殺旅順口廣鹿島官員。率官兵反。共趨登州。有德以仲明為總兵官。陳有時毛承祿亦授為總兵。其餘善戰之士各量功授職。兵勢甚

盛。衆官弁欲尊有德為主。有德辭曰。予初起義。何敢遽當王號。衆強之。乃自稱為都元帥。以李九成為副元帥。鑄印登壇。宣告州郡。整飭兵馬。攻取城堡。遇官兵輒擊敗之。殘破各處地方。山東皆亂。威名大振。駐紮登州府。明遣總兵官祖大弼率兵數萬來攻登州。圍之。有得等乘明兵懈出戰。突入其營。殺傷甚多。以副元帥李九成陣亡。始退入城。堅守。尋聞明兵屢至。度不能支。乃與仲明等整頓戰艦。衝突出城。來奔我國。為

旅順口城守總兵黃龍水兵截殺副將李應元。田良祚俱戰死。明寧遠登州及旅順口官兵又以船追擊。有德等因先已服廣鹿長山鹿長山等島。欲從鎮江登岸。朝鮮又以兵助明邀擊之。適

太宗遣濟爾哈朗阿濟格杜度。三月勒率兵迎於江岸。相對立營。明兵及朝鮮兵見我兵勢盛。始退於岸。不遺一物。三月勒大宴有德。又以馬二千餘匹散與其將士乘騎。留船礮輜重於江岸。以兵

守之。三月勒携歸附官兵起程。

太宗以有德等千里來歸。諭勿令在途勞苦。隨處設宴。

安插東京。復遣副將金玉和往東京。

諭有德曰。爾等身皆勞頓。宜休息數日。從容來見。有德遣部下副將劉承祖賫疏奏曰。臣有德等所部官民。先來者俱已安插給餉。欲赴

闕謝

恩。但續到官民。尚未安插。不敢輕行待事。竣日候旨朝謁。七年五月。

太宗遣文館遊擊范文程。羅碩。剛林。安棟。有德等。

諭曰。孔耿二人。令其統領兵馬。駐劄東京。號令鼓吹。執

事儀從。俱許照舊。惟刑人出兵二事。當來奏聞。所屬

人民。安棟。蓋州。鞍山。如或不願。令住東京鄰近地方。

又遣文館覺羅龍什。愛巴禮。敦多惠。傳諭諸貝勒曰。

今欲賞明國新降元帥孔有德等物。每貝勒可出上

等鞍馬一匹。空馬四匹。朕與爾等共出馬四十匹。滿

洲蒙古漢人。各按世職。每十備禦出馬一匹。約馬百

匹。選上等者。賞其大帥。餘馬付有德等。令按品散給。

是月有德等自鎮江遣副將曹紹宗。劉承祖等。

來奏起程緣由。

太宗命督修岫巖攬盤通遠堡三城之濟爾哈朗。阿濟

格。杜度。三貝勒率兵迎之。六月文館儒臣范文

程。敦多惠等自東京召新附元帥孔有德。總兵

官耿仲明及各官至。

太宗率諸貝勒出德盛門十里。迎至渾河岸。中設黃幄。

左右各設五青幄。

太宗與諸貝勒率孔有德。耿仲明及伊等帶來各官謝

天行三跪九叩頭禮畢。議孔有德、耿仲明謁見之禮。應否。抱見諸貝勒咸謂不宜抱見。但以禮相待可耳。

太宗諭云。元帥總兵奪取登州。攻城畧地。正當強盛。而納款輸誠。三遣使者。率其兵民航海衝敵來歸於我。功孰大焉。朕意當行抱見禮。議既定。有德偕仲明率各官以次序立。二人向前行漢禮朝見畢。復近御座前叩頭抱膝見。嗣與大貝勒代善叩頭抱見。次與諸貝勒序齒。互行抱見禮。次各官行三跪九

叩頭禮畢。

命有德與仲明坐於

御座下。有德等進獻金銀并金玉器皿。綵緞衣服。俱納之。設大宴。以金卮酌酒。

親賜有德及仲明。宴畢。各賜蟒袍。貂裘。撒袋。鞍馬等物。越二日。

太宗召有德及仲明。率其所屬衆官入宮。賜宴。有德、仲明拜見畢。

命坐於

御座下左側。次日大貝勒代善設宴。有德及仲明拜見。代善下榻答禮。亦令坐於左側。小榻次和碩諸貝勒設宴。親迎至門。坐有德左側。仲明右側。八月封孔有德為都元帥。

賜之勅印。又諭有德等曰。與爾等同破山東歸降諸將。宜察其功之大小。用印給諭畢。

太宗率諸貝勒御樓。召有德及仲明登樓宴之。八年五月

賜有德所統兵號為天祐兵。閏八月從大兵征明。由大

同入邊。有德遣部下副將黑成功。率三十人。佟三率五十人。敗明兵八百人。獲馬二十匹。

賜有德及仲明銀各三百兩。緞五疋。襲衣五襲。銀盃盤二副。令其賞部下有功官員。九年五月。有德與仲明輸糧助賑。

太宗以歸附人民糧已足用。俱令運回。崇德元年。始建國。國號大清。大封諸貝勒王爵。於是封有德為恭順王。是年冬十二月。

太宗親統大兵往征朝鮮。

命有德同懷順王耿仲明知順王尚可喜及各固山下
烏真超哈全軍在後護送紅衣法貢等礮及烏
鎗車牌輜重等物二年二月朝鮮降復
命有德同耿仲明尚可喜各率全軍及每牛象甲士四
人舁紅衣礮十六位領朝鮮兵船五十隻往取
明皮島三年四月克之斬明守將沈總兵九月
奉命大將軍睿王多爾袞統兵征明徵有德及
耿仲明尚可喜三王兵
勅曰王等將部下紅衣礮一切火器馬步官軍及戰車

於本月二十五日俱至盛京各帶兩月行糧勿違冬
十月有德及懷順王耿仲明昂邦章京石廷柱
馬光遠等以神威將軍礮攻五臺克之又以神
威將軍礮攻戚家堡石家堡並克之獲人三百
十七名口俱付戶部叅政馬福塔携歸大兵從
墻子嶺口拆毀邊墻而進有德與耿仲明兵俱
從邊城大門之東小門平坦處舉火礮豎雲梯
攻之

太宗復親率大兵從義州一路進發

命有德等三順王俟大營移後以神威將軍礮攻錦州城西臺有德等方欲進攻臺內礮藥自發臺崩遂克之十一月有德等招降大福堡又以神威將軍礮攻克大臺一座獲蒙古漢人男女共三百七十九名口得旨令盡殺其男子餘俱賜孔有德等時

太宗駐蹕連山

命有德等及烏真超哈兵以火礮攻五里河臺壞其兩角臺上人皆懼守備李計友李惟觀率兵來降

一無所犯皆編為民四年正月壬寅有德奉

命同耿仲明尚可喜等以紅衣礮擊松山城東隅山臺

臺上藥發自焚百總一員及兵丁俱為火所燔獲臺後盡殲其人路旁有二臺俱招降之壬子

太宗駕至松山南岡相度城勢指示有德及耿仲明尚

可喜石廷柱馬光遠曰城南門中間以孔有德兵右

面以耿仲明兵左面以尚可喜兵俱用神威將軍礮

攻擊耿仲明所攻處馬光遠以本旗兵協攻城門用

紅衣礮九位東南隅用紅衣礮二位城隅中間用紅

衣礮一位。攻擊尚可喜所攻處。石廷柱以本旗兵協攻城南門。用紅衣礮八位。西南隅用紅衣礮二位。城隅中間用紅衣礮一位。攻擊癸丑四鼓。有德同耿仲明尚可喜各移礮前進。五鼓放礮。松山兵出城迎戰。為我兵射退入城。於是用紅衣礮攻至未時。城堞盡毀。止餘城垣。守城副將金國鳳死守。用草木填其額處。以為捍蔽。禮親王代善以日將暮。應俟明日攻之。始撤兵。五年大兵更番圍明錦州。六年四月遣有德及尚可喜各率本部

官兵詣錦州。助鄭親王濟爾哈朗軍。七年克之。順治元年有德隨睿王入山海關。擊敗流賊。二年十月

賜有德貂裘蟒緞朝衣一襲。金百兩。銀一萬兩。馬二匹。旋

命有德還

盛京。仍諭厲兵秣馬。以俟調遣。四年以有德為平南大將軍。率師往平湖南。所向皆捷。十二月有德報捷。疏言臣等自岳州府進兵至長沙。偽巡

撫何騰蛟。總兵王進才已先遁去。隨遣梅勒章京卓羅藍拜等探其所向。遇進才部賊捨舟登岸逆戰。卓羅等擊斬之。我師次湘潭。聞偽平尚伯黃朝選擁賊十三萬屯於燕子窩。臣率梅勒章京藍拜佟代等由水路進至瀘口。擊破北岸賊營。臣等星夜進兵趨衡州。朝選與其四子匿於神祠內。搜獲斬之。餘孽盡殲。臣又令懷順王耿仲明固山額真金礪梅勒章京卓羅等由衡州水路還長沙。遇偽總兵楊國棟擁賊二千屯

天津湖前隊。甲喇章京張國柱扎蘇藍等擊敗其衆。次日國棟領馬步賊三千從牛皮灘遁去。我兵追斬國棟。生擒偽副將七員。又聞賊困桂陽州。令智順王尚可喜同藍拜等赴援。留固山額真金礪等於衡州。臣同懷順王耿仲明併卓羅等趨祁陽。聞賊兵三千據熊飛嶺。隨率兵三百趨擊。追入祁陽。比我兵齊集。圍其城。殺偽總兵一員。副將一員。馬步賊七千。又聞賊據寶慶。留懷順王耿仲明為後應。臣引兵趨寶慶。圍其

城克之。斬偽魯王朱鼎兆世子朱乾生。偽總兵黃晉、李茂功、吳興、偽監司劉佐、偽副叅遊守四十餘員。馬步賊三萬二千。又聞偽桂王據武崗州。我兵夜發疾進。令梅勒章京黑成功、固山大烏赫納等為前隊。遇賊梗路。黑成功等進擊。賊衆奔入木城。次日。我兵縱火焚木城。奪門而入。斬偽監軍道一員。偽總兵副將以下一百餘員。馬步賊首級一萬。是日。偽安國公劉承蔭領偽總兵副將等官一百七十餘員。馬步兵一萬八

千有餘。至夕陽橋。臣同梅勒章京卓羅等擊敗之。師抵武崗。偽桂王遁。劉承蔭降。先是智順王尚可喜等趨桂陽。時聞郝搖旗所部賊一千四百聚翔鳳舖。令纛章京線國安、固山大蘇朗等擊敗之。及師抵桂陽。賊已解圍遁走。退據道州。即令藍拜等進勦。搖旗逸去。又遣國安等引兵趨靖州。追緝偽桂王。有偽總兵蕭曠、姚有性、擁賊一萬。土司兵二千。據靖州。國安等疾驅圍其城。奪門而入。生擒曠及有性。餘賊悉殲。又有偽

侍郎蓋光英等領土司兵一萬四千揚言欲奪
蕭曠姚有性侵犯我營復擊敗之我師趨沅州
聞偽伯張憲弼部下偽總兵分立五營於黔陽
令藍拜等往圍其城賊出城迎戰藍拜等擊敗
之斬賊七千有餘師至沅州憲弼擁賊三萬有
奇出城拒戰我兵奮擊遂克其城湖南悉平貴
州黎平府偽岷王朱埏峻亦來降計前後所獲
偽桂王子朱爾珠驪山王朱埏琬安昌王朱埏
眷併偽將軍宗室等二十七人招降偽國公劉

承廢偽伯王雲程劉承永董英周思仲高清浩
鄭應昌偽內閣吳秉偽巡撫傅上瑞及偽總兵
四十七員偽副將以下二千餘員馬步兵六萬
八千有奇獲馬匹船隻無算苗夷降者過半其
未降者已遣人招撫新服地方需人料理隨令
總兵官于時中副將王希用率新降兵二千四
百駐衡州府又委副將何允為總兵官同副將
劉尚艾率新降兵一千二百駐武崗州投誠總
兵官陳躍龍副將蕭遠領新降兵三千駐黎平

府偏沅巡撫高斗光有疾。委投誠偽伯周思仲代之。又令投誠副將張勤領新降兵一千同周思仲駐沅州。總兵官馮蛟麟駐常德府。疏入。詔旨褒答之。五年正月。以湖南六府底定。苗民就撫。賜有德黃金二百五十兩。四月。有德疏報。大兵至辰州。

擒偽榮王朱有楨子朱松於苗峒。又生擒偽奉國將軍朱運烜于興化土司。隨破永寧巢。擒偽貴溪王朱長標。兵至廣西全州。何騰蛟等聞風遁去。貴州銅仁府。廣西全州。興安縣。灌陽縣。苗

獠共三十一處。峒二百六十處。俱各歸順。擒獲偽商威王朱寅衛并子朱載功。偽長沙王朱由榔。偽輔國將軍朱華宗室共四十一人。及偽伯偽總兵司道官員甚衆。疏入。下所司查叙。九月。有德等班師還。六年五月。改封有德為定南王。授

金冊。其文曰。茲爾孔有德原係漢臣。見明朝之氣運衰微。遂起兵行元帥事。殘破山東地方。全携將吏軍民航海來歸。原給都元帥勅印。於崇德元年四月二十

七日。優加冊印封恭順王。俾功名富貴。帶礪山河。子孫世世承襲。一切過犯。盡皆原宥。後隨多羅克勤郡王取旅順口時。爾率所部兵協攻。平定朝鮮國時。爾率所部隨輔政叔德豫親王。破其救兵。和碩英親王取皮島時。爾率所部兵協攻。圍困錦州時。和碩鄭親王破洪軍門兵。爾率所部兵交戰。攝政王取杏山時。爾率所部兵協攻。和碩鄭親王取中後所前屯衛時。爾率所部兵協攻。攝政王平定明朝天下。入山海關之日。殺敗流賊二十萬。爾率所部兵交戰。又追擊流

賊至慶都縣。爾率所部兵交戰。輔政叔德豫親王領兵勦流賊。滅福王。平定河南。江南。在潼關殺流賊時。爾率所部兵交戰。取揚州時。爾率所部兵協攻。取江陰縣時。爾率所部兵協攻。又特命爾領兵進取湖南。爾隨宜勦撫。攻克郡邑。處處殺賊。招撫官吏兵民甚衆。爾原封恭順王。今授金冊金印。加封為定南王。爾其益勵忠勤。奉公守義。以報特恩。尚其欽哉。是月有

德奉

命率舊兵三千二百。及新增兵一萬六千九百。共二萬

往定廣西。仍挈家駐防。其全省巡撫。道府。州縣。各官。併印信。俱令携往。

賜之勅諭曰。廣西逆賊。盤聚煽亂。斯民陷於水火。茲特命爾統領大兵。相機征勦。投誠者撫之。抗拒者誅之。若武官有功。覈實題叙。有臨陣退縮。遲悞兵機。不遵號令。應分處者。聽王便宜從事。若罪大不便自處者。指名叅奏。地方既定之後。凡兵機事務。悉聽王調度。其一應民事錢糧。仍歸地方文官。照舊料理。文武各官有事見王。俱照王禮謁見。王受茲重任。其益殫忠。

猷禮以律已。廉以率下。務輯寧疆。圉寬朝廷南顧之憂。欽哉。七年十一月。有德攻拔桂林府。擒斬甚衆。兩粵道通。八年正月。有德疏報攻克廣西省城。底定桂平二府。擒斬偽靖江王并世子將軍中尉。閣部總兵文武等官四百七十三員。招撫二百四十七員。獲馬騾器物無算。下所司察叙。閏二月丁卯。有德報遣總兵官線國安。馬蛟麟等領官兵前進。七月克梧州柳州二府。並所屬十二州縣。下兵部知之。九年三月。有德奏報粵西桂

平梧柳四郡。俱已開闢。尚餘五府未歸。分遣鎮臣線國安、馬雄、全節等領兵三路進取。臣親率大師直抵賓陽。居中策應。思南、慶橫等二十二府州縣盡入版圖。下兵部察叙。又報偽慶國公陳邦輔殺偽宣國公焦璉率潯州郡縣並所部官兵繳印投誠。下所司知之。七月偽秦王孫可望令偽安西王李定國攻陷衡永全諸州。進攻桂林府。有德出戰。敗績。城陷。自縊死。偏沅巡撫金廷獻以

聞。

十年五月遣官諭祭。賜謚武壯。是歲喪還京師。十一年六月甲子。

詔工部為定南王孔有德造墳立碑。十月丁丑。

諭禮部曰。朕念定南武壯王孔有德。審時率眾航海來

歸。屢建功績。佐朕平定天下。勦巨寇。靖南服。開闢廣

西。勲勞懋著。不意桂林之役。眾寡不敵。精忠自矢。竟

以身殉。似此功臣名應不朽。稽考舊典。有立祠致祭

之例。爾部詳察具奏。十月禮部覆准。立定南武壯王

祠。以二妃陪祀。俱設神主。春秋致祭。康熙三年

四月有德女四貞疏言。臣父孔有德死節桂林。蒙

世祖章皇帝軫念孤忠。易名賜葬。仍命廟祀。乃建祠一事。工部疏議以

孝陵碑未建。不便即行。泣思先臣航海投誠。舍生報國。北討南征。勲猷懋著。今筑筑孤女。僅延一綫。所

望

國家春秋二祭。庶令忠魂有歸。伏祈再沛成命。速令興工。則勞臣報國之靈。與普天効忠之氣。俱

感激無涯矣。得

旨。定南王先奉

世祖章皇帝旨。每年春秋致祭。著照舊遵行。有德一子為李定國所擄。惟女四貞存。

特恩照和碩格格食俸。四貞適孫延齡。十二年十二月。吳三桂反。

聖祖仁皇帝特旨。以延齡為撫蠻將軍。率師駐防廣西。十三年二月。延齡據桂林叛。降於三桂。自稱安遠大將軍。十四年。四貞勸其反正。代延齡具疏。

乞降。

聖祖許之。十五年冬。吳三桂遣其孫吳世琮。至桂林。誘
執延齡。殺之。十八年二月。撫蠻滅寇將軍傅弘
烈。鎮南將軍莽依圖。擊走吳世琮。四貞歸於

京師。



